



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Israel-i Gaza nung Hamas
tanishir tepsetba jangjaogo

Zinedine Zidane'er jabaso
Luca AFCON asayatsü



VOL. XXIII ISSUE NO. 69 (ADOK 69) DIMAPUR TENTONÜ (MONDAY) LUCHII (DECEMBER) 15, 2025

₹ 5.00

NNQF aser CTAN-i single-bench court order magizüker

Dimapur, December 14, 2025 (TYO): Higher Education Department nung backdoor appointments ta tai tonglokja aliba atema tawa single-bench court kati tetuyuba agütsüba atema tebilemtsü abener ta Nagaland NET Qualified Forum (NNQF) aser Combined Technical Association of Nagaland (CTAN) teloktemi metetdaksüogo.

Parnokisa state sorkar dang Assistant Professor posts 129 tasen tentetba indang advertise asütsü ayongzükogo.

Parnok shimba mapang NET-qualified masü liasü anungji petitioners-i backdoor mesüra contractual appointments anema noktaksü kecha tamendakdak mali ta single-bench order nung shia lir.

Iba tetuyuba ya public forums nung kanga lemsatepogo aser petitioners dak alia tangar dak-a kongshitsü ta NNQF aser CTAN-i ashi.

Iba oshidang ajanga Nagaland nung zünger mapa manguba lanurtemi tarutsü nung backdoor appointments anema ken o mebenoktetsü aser iba ajanga parnok career nung kongshitsü ta parnokisa metetdaksü.

NNQF-i public interest tenüng nung division bench ka tsüingdang temepishiba ken o ka benokogo ta parnokisa ashi.

Assistant Professor mapa 129 tentetba aser tesüiba nung

contractual Assistant Professors 147 regularise asütsü maparen nung metokmeperitem lir. Item tetuyuba anaprong ya Personnel & Administrative Reforms (P&AR) aser financial clearance numbers kasa ajanga agütsü aser iba ajanga ratateper, ta NNQF aser CTAN-isa metetdaksü.

Iba osang jangjatsü atema RTI ka benok aser iba telangzüba nung clearance numbers kasa süaka mapa 129 tasen tentetba ya contractual posts 147 nung alirtem anioktsü atema masü ta shia lir.

P&AR clearance ya 2022 nung agütsü aser financial clearance ji 2023 nung agüja lir. Külen mapa 147 regularisation asütsü merangba ya 2024 nung inyak aser 2025 nung agien, iba sülen mapa tasen 129 adokdaksü. Ibala inakyim ajanga public-i temulung melemtetsü anungji tashishitsü melii inyaksangshitsüla ta parnokisa ashi.

Tang tashi Assistant Professor mapa tasen 129 atema advertise masü lir. Maneni, Common Educational Services Examination (CESE) advertisement ano magütsü lir ta NNQF aser CTAN-isa ashi.

Anungji bangdakpurtemi tekaratiba nung Assistant Professor posts aser CESE atema advertisements agütsü ayongzüköer ta parnokisa metetdaksüogo.

Dzukou Valley nung morok mi mazüokteter

Dimapur, December 14, 2025 (TYO): Kohima district kübok Dzukou Valley nung tanü agi anogo asemubaba morok mi mazüokteti lir.

Mopung kanga aonba ajanga miji Japfu mountain range leni kaoloka aoer aser iba jagi December 14, Deobarnü ketdangsürtemi aerial firefighting operations tenzüksü atema sentong atongtsü tenzüko.

Dzukou Valley nung morok mi ya Hokolbar nungi tenzüker aser takong den mopung aonba ajanga jangruloka aoer. Tang tashi nung iba mi ajanga 1.3 square kilometers shi nung kongshio saka tuluba küma odor, ta ketdangsürtemi ashi.

Kohima district administration-i Bambi bucket enokba Indian Air Force helicopter ka amshitsü lemtetogo ta District Disaster Management Authority (DDMA) ketdangsür kati ashi.

Iba ya Nagaland State Disaster Management Authority ajanga inyaker

Iba mi ya local trekkers pezüi parnok campsite nung mi aputetdang tenzüker ta ketdangsürtemi ashi. Parnok tzü tabeni aodang mi tuluba aküm aser parnok mejenbuteti lia December 13 nü Khonoma Youth Organisation nungi volunteers ajanga kümzüker.

Khonoma Youth Organisation nungi volunteers-i police, fire services, forest officials aser disaster management personnel den külemi yariteper.

Morok mi ya Jotsoma-Khonoma arrtsülen Hophera Thi anasa tonga odor aser iba ajanga ano tuluba kaoloka aotsü ana nung lir ta ketdangsürtemi ashi.

Hokolbarnü Southern Angami Youth Organisation (SAYO)-i Dziükou Valley nung trekking anena ataba osang metetdaksüogo.

Iba morok mi meinsep tashi aser lendong nungi jenbua maküm tashi Dziükou Valley nung trekking anena atar ta SAYO-i rongdak osang ka metetdakja liasü.

Dimapur nung ki 300 shi mitsü küma rongdokogo



Dimapur, December 14, 2025 (TYO): Deobarnep East Block, Burma camp nung kitsükkirong lendong tulu ka atalok aser iba mapang ki 300 shi rongdokba agi kibong 500 tema talidak maka kümogo.

Ajisüaka, tia kaa iba lendong nung nisung asüba mesüra yiruba osangbo kecha mali.

Iba lendong ya tanep 6:30 ako meta atalok aser miji kaoloka ao. Ajisüaka, mapang shitak nung fire tenders aruba ajanga mi ensepteta

liasü ta colony council-i ashi.

Iba tesem nung alir teimbaka non-Naga nung lir aser parnoki sen lakh aika alang akoksaogo. Talidak maliba kibongtem jenokdaksütsü asoshi colony telongtet nung relief camp ka lapokogo aser colony council-i district administration dang relief aser assistance meshiogo.

Tanep 7:00 ako meta kitsükkirong lendong atalokba osang sangoktsü aser idangjisa fire tenders 4 den fire personnel

lendong atalokdaki yok ta Central Fire Station ketdangsür kati ashi.

Iba sülen West Fire Station nungi fire tenders 3 aser Chümoukedima nungi fire tenders 2 arua yariteper.

East Block colony tanishirtem aser nübortemi district administration, local MLA aser state sorkar dang mi lendong ajanga takoksa ajurua alirtem tekaratiba nung yaritsü mepishia metetdaksüogo.

Manipur teloktem Jantar Mantar nung lungkak ait

New Delhi, December 14, 2025 (Agencies): Manipur nung amenoka aliba telok aikati December 14, Deobarnü Jantar Mantar, New Delhi nung lokti lungkak aitba sentong tulu ka ayonga agiogo.

Manipur nung Internally Displaced Persons (IDPs) parnok talidaki yokang aser kümzüka yuang ta takhangba agüja parnoki lungkak ait.

Iba sentong ya Delhi Meetei Co-Ordinating Committee (DMCC), Manipur Students' Association Delhi (MSAD), aser United Kakching Students (UKS) ajanga ayongzük.

India sorkari Manipur tensa atema aria mebilemtsür, asaa mapa meinyaker aser anemsü ayir ta lungkak aitertemi ashi.

Meetei aser Kuki nung pei talidak toktsür aoertem relief camps nung maneni lidar aser parnok aliba tia ya kanga majung ta parnokisa ashi.

Sorkari "divide-and-rule" policy inyaker Suspension of Operations (SoO) framework kübok telungpur teloktem sorkari pusema nungiter aser iba ajanga kin o kin tsüingda telemsa talila akümer aser pei talidak toktsür aoertem meyipa aotsüba nung tenokdangba agütsür ta tanü lungkak aitertemisa metetdaksüogo.

IDPs aikati tashiyim agi pei

tasoyimtem nungi odaktsü aser parnokia lungkak aitba nung shilem agia liasü.

Mapang talangka parnok pei talidaki meyokba ya sorkari tasa atonga inyakba aser merenshiba lir ta parnoki tai tongloksür.

Mapang talangka relief camps nung puoka lidaktsüba ya constitutional rights aser fundamental human dignity anema lir ta parnokisa ashi.

Iba sentong nung DMCC Convenor Dr Seram Rojesh, DMCC Spokesperson Dr Naorem Bobo, DMCC Advisor Hijam Rajen, social & gender activist Elizabeth, Women's Wing Spokesperson DMCC Sangeeta, MSAD President Lanchenbi, aser Manipur Sikh & social activist Amarik Singh Pawal nungeri jembi.

May 3, 2025 nungi Meitei aser Kuki nung nisung 65,000 tema pei talidak toktsür aotsüsa aküm aser pei lima nung refugee kümmdaktsüogo.

Centre-i aiben nangzüka aruogo aser December 2025 tashi nung mapa inyaktsü ta mapang züingzüksü saka tang tashi nung policy framework, rehabilitation roadmap mesüra resettlement atema financial package kecha mali.

Security personnel-i IDPs dak tashiyim mapa inyaker aser pei kidangi aotsü asoshi civilian tem

noctang. Ajisüaka, külen SoO kübok aliba telungpur teloktembo talenba kecha melii senzüsenbonger ta lungkak aitertemi ashi.

Supreme Court-i Chhattisgarh nung Salwa Judum loksatsüogo aser proxy armed groups amshiba ya ozüingi memelar anungji Manipur nunga kasa mapa inyaktsüla. Mitkar tashi amshia, kin o kin bendanga mesüra yimtenren tsütsü külen tsütsü shir yimjung mengutettsü ta parnokisa metetdaksü.

India sorkari tangsa Meetei aser Kuki nung IDPs ajak pei pei talidaki yoktsüla aser Suspension of Operations (SoO) framework agientsüla ta parnoki takhangba agütsüogo.

Külen, Suspension of Operations (SoO) agreement kübok aliba Kuki-Zo teloktemi Ministry of Home Affairs (MHA) dang parnoki tanaben Manipur nung madentsü ta metetdaksüogo.

Iba tebilemtsü koktettsü atema lenmangji Union Territory with a Legislature tentettsüba dang lir ta parnoki ashi.

New Delhi nung tripartite negotiations tanabuba amendang Kuki-Zo teloktemi iba osang metetdaksüogo. Iba senden nung MHA, Kuki National Organisation (KNO), United People's Front (UPF) aser Manipur sorkar aden.

KVK Phek nung backyard poultry farming training agütsü



KVK Phek nung scientific backyard poultry management indang training agidang tangokba noksa ka nung ketdangsür, shisalen sayur aser shilem agirtem angur.

Dimapur, Luchii/December 14 (TYO): Porba yimtsüng nungi aluyimer atema 'Empowering rural livelihood through scientific backyard poultry management' indang asemnü training sentong ka KVK Phek nung ICAR-IVRI, Bareilly (UP) ajanga December 10-12, 2025 anogotem ayongzüka liasü.

Iba training sentong ya ICAR-ATARI, Zone VII, Umiam kübok ICAR-Krishi Vigyan Kendra (KVK), Phek (ICAR-NRC on Mithun, Medziphema, Porba) den lungjemer ayongzüka liasü.

Sentong tenzüka Dr. Sanjeev Kumar Singh, Senior Scientist & Head, KVK Phek ajanga pela agizükba o jembia aser scientific poultry management amshia yimdak yimtsüngtem nung pei poksünga alitsü atema training ya agütsür ta ashi.

Principal Scientist & Head, ICAR-IVRI, Dr. MH Khan-i sentong tenzüka jembidang, aluyimer nem technical skills tajungba agütsüsü aser region nung an metsüba yimya tajungba amshidaksütsü atema training ya ayongzüka ta ashi.

Meta talang nung aser tribal nisungtem aliba tesem nung aluyimer yaritsü atema NEG component kübok ICAR-IVRI, Bareilly ajanga iba mera agia scientific shisatsü agütsüba atema pelaba lemsatapa liasü.

Dr. Khan-i training nung shilem agirtem dang pei senpong tajungba akumtsü aser pei yimtsüngtem nung backyard poultry production tashi itshitsü atema iba training nung temulung agüja adentsü ayongzüka.

Mezüng technical session nung Scientist, ICAR-NRC on Mithun, Dr. Narendra VN-i 'entrepreneurship opportunities in poultry' onük nung jembia aser Dr. Yallappa MS, Scientist, ICAR-NRC ajanga 'importance of climate-resilient poultry farming' indang jembia liasü.

Tanabuba aser tasembuba technical sessions nung mongin temi jembia liasü. Dr. Hannah K Asangla, CTO, Agronomy-i aluyimba aser sendaktepa aliba sector nungi senotsü lenmang bushiba inyakyim indang jembia. Dr. T Esther Longkumer, CTO, Soil Science ajanga natural farming indang jembidang poultry units ajanga soil health

nung shilem agiba indang rasaa ashi.

Dr. Harini KR, SMS, Animal Science-i an nem chiyongtsü agütsüba aser ki yanglutsüba indang jembia liasü.

Dr. Ragulraj S, STO, ICAR-NRC on Mithun, Porba ajanga entzü akoba tesem ketdangsüba, tashidak anepaluba, senotsü lenmangtem indang jembia aser Manjunath KS, SMS, Horticulture ajanga horticulture indang jembia liasü.

Anogo asem training sentong nung shilem ka ama aluyimer temi KVK Phek indang Poultry Unit semdanga liasü.

Iba sülen sensaksemba mapang alidang shilem agirtemi poultry sector nung timtem ajuruba indang lemsatapa lenmang sayutepa liasü.

Training nung shilem agirtemia parnoki ajangshiba lemsatapa. Iba sentong nung shilem ka ama an chanu den chiyongtsü tem lema agütsü.

Shilem agir ajunga nem kulizüng kakat agütsü aser sentong tembanga Dr. Hannah K Asangla-i melepzüng o jembia liasü.

Arunachal gari lendong mechi Tinsukia nung nisung ana apu

Dibrugarh, Luchii/December 14 (Agencies): Tinsukia kübok Gelaphukari tea estate nungi ozüng alema labourers tem Arunachal Pradesh-i yokba nung gari lendong ajurua aayanger nisung 21 takum samaba dak sendakba nung Tinsukia nung Assam Police-i nisung ana apu.

Parnoki pua alirtem ya arishi küm 36 tain Md Sirajul Ahmed aser arishi küm 27 tain Sairuddin Ali ta jangjaogo aser tenaprong ya Tinsukia district nung Guijan area kübok Balupara Gaon village nung alir.

Arunachal Pradesh nung Anjaw district nung kisü-jensüba tesem kati truck ka nung aayangertem mener aodang December 8, 2025 nü Hayuliang sub-division kübok Chaglagam Circle anasa HMC (Hayuliang-Metengliang-Chaglagam)

lenmang nungi ajuzüka longren nung metres 700 shi lur tsük.

Iba lendong nung driver dena nisung 22 liasü.

Police temi Deobarnep tashinung nisung 20 tasümgang ngutetogo aser rescue team tang tashi maparen balala inyaktar.

Lendong ajurur alirtem kidanger state-i bener aoba mapang mandatory protocols nung aibelen, ta Senior Superintendent of Police (SSP) Tinsukia, Mayank Kumar Jha-i ashi.

"Bushisüngdangba mapang aayanger tem anir aoba nungya ozüng nung aibelena aliba ngutet, kechiaser parnok documentation shidak mali mesüra safety measurers kecha mali ozüng alema anir ao. Onoki Tinsukia Sadar Police Station nung ken o ka benoka bushisüngdang tenzüka," ta SSP-i ashi.

Nagaland Contractors' & Suppliers' Union pre-Christmas mungogo



Nagaland Contractors' & Suppliers' Union (NCSU) pur Christmas yongya aser NCSU küm 50 ajungba tenügsang agütsüba aser Best Traffic Awards 2025 sentong nung tangokba noksa ka yangi angur.

Dimapur, Luchii/December 14 (TYO): Nagaland Contractors' & Suppliers' Union (NCSU) pur Christmas yongya aser NCSU küm 50 ajungba tenügsang agütsüba aser Best Traffic Awards 2025 sentong ka Pele Khezhe Stadium, Riizezou D' Khel, Kohima village nung December 13, 2024 nikongdang agia liasü.

Sentong nung NCSU tir Pele Khezhe-i jembidang Nagaland nung industrial mapa ya kisü-jensüba dang lir, ta ashi aser terelok mapa tejakleni aotsü atema yaritsü ayongzüka liasü.

2026 küm tetenzüklen NCSU hon jubilee amungdang Union Minister of Road Transport & Highways, Nitin Gadkhari adentsü, ta Khezhe-i metetdaksü.

Pai NCSU zümgsemtem lungjema alitsü aser jubilee takok ngua amungtsü atema meranga inyaksü ayongzüka.

NCSU tir-isa Nagaland nung aliba nüburtem dang benjong salem lemsatapa liasü.

MCSU küm 50 ajungba atema Kohima Superintendent of Police (SP) Krodi Rhetso-i iba sentong nung tenügsang agütsü aser nenoki Nagaland nung aliba nüburtem asoshi mapa tajung jenti inyaker ta ashi.

Rhetso-isa NCSU dang rongsenketzüng tajungba akumtsü atema kisü-jensü mapa

nung local engineers, architect aser lanurtem amshitsü ajungshia liasü.

NCSU-i küm shia Best Traffic Award agütsüba atema SP Kohima-i pelaba lemsatapa aser iba ya ajanga traffic personnel temi nüburtem tenzüksü atema tali ajungmesor ta ashi.

Phezoucha Nagamese Baptist Church indang pastor, Rev. Velavoyi Keyho-i sentong nung jembidang Tsüngrem anasai tali aotsü ashi.

Paisa Christmas mapang temeim aser yimjung indang osang prokshitsü ayongzüka liasü.

"Nai kechi inyakdir, Tsüngrem mezüng südakjang," ta pai ashi.


Iba sentong nung North Traffic Control nungi Khrievotuo-ii Zumvii aser South Traffic Control, Kohima nungi Nuseta Medeo na nem tetsür aser tebir Best Traffic Awards 2025 agüja liasü.

Sentong nung NCSU tatong tir KL Setuo Rutsa menden liasü aser NCSU secretary Tseibu Khesoh-i pela agizükba o jembia.

Inato Assume-i temeja ken ka aten, Hoshito Assumi-i melepzüng o jembia.

Sentong tenzüka NCSU advisor T Yanger Imchen-i sarasadem aser sentong tembanga NCSU advisor SK Rengma-i sarasadema liasü.

DONER Dy. Secretary-i Wokha district semdang



DONER Ministry indang Deputy Secretary-i December 12, 2025 nü Wokha district kübok Ruchan yimtsüng semdangba mapang tangokba noksa nung angur.

Dimapur, Luchii/December 14 (TYO): Deputy Secretary, DONER Ministry, Sandeep Singh aser pa kinungtsü nati December 12, 2025 nü Wokha district kübok Samphav, Ruchan

aser Yonchucho yimtsüngtem semdanga liasü.

Iba mapang pai putu menden, VDB aser sendaktepa aliba department tem den senden ka mena liasü. DONER

ketdangsüri yimdaklir den yimtsüng nung terenlok schemes balala indang jembia aser scheme tem mapa kuma inyaker aliba indang asüngdanga tsüngtong oa repranga liasü.

Onoki Narendra Modi-RSS sorkar agientsü: Rahul Gandhi



December 14, 2025 nü New Delhi nung 'Vote Chor Gaddi Chhod' rally jakdang Congress party headquarters nung Himachal Pradesh Chief Minister Sukhvinder Singh Sukhu, Karnataka Deputy Chief Minister D.K. Shivakumar, Congress lenir Mukul Wasnik aser tangartem tangokba noksa nung angur.

New Delhi, Luchii/ December 14 (Agencies): Amongnü Congress lenir Rahul Gandhi-i, par party-i ochi atema nokdaker, ta shia "Narendra Modi-RSS sorkar" agientsü, ta metetdaksü.

Delhi nung aliba Ramlila Maidan nung Congress party-i ayongzükba 'Vote Chor Gaddi Chhod' rally nung jembidang Lok Sabha nung opposition leniri Election Commission-a sashia aitsü.

Rahul Gandhi-i, Chief Election Commissioner Gyanesh Kumar den Election Commissioner ana Sukhbir Singh Sandhu aser Vivek Joshi nungeri BJP pusema inyaker, ta aitsü.

"Onoki ochi atema nokdaker aser Narendra Modi-RSS sorkar agientsü. Parnok dak tashi lir aser parnoki vote auyar," ta pai ashi.

Paisa, Bihar election mapang nung BJP-i tetsür shia nem sen 10,000 agütsü saka

Election Commission-i parnok anema meinyak, ta ashi.

"Ochi aser tiyazü na tsüngda raraba mapang nung Election Commission-i BJP sorkar den külemi inyaker," ta paisa metetdaksü.

"Election commission nem tashi agütsütsü atema Modi (Narendra)-i ozüng tasen ka benok. Onoki iba ozüng melenshitsü aser election commissioners anema inyaksü," ta pai ashi.

"Mapang talangka agiaka tatemsabo ochi jungkai adoktsü. Onoki ochi nung inyaksü aser Modi o (Amit) Shah na tamakok ngudaksütsü," ta pai ashi.

Kasa sentong nung jembidang Congress Tir, Mallikarjun Kharge-i, Manusmriti, Rashtriya Swayamsevak Sangh (RSS) aser Bharatiya Janata Party (BJP) tangatetbatem ajanga iba linük raksatsütsü; opposition party tangatetba ajanga dang

linük temzüng kümzüksü, ta ashi.

Kharge-i, "Congress party tangatetba ajanga dang linük kümzüksü. (Mohan) Bhagwat tangatetba, (Madhav Rao) Gowalkar Guruji mesüra Manusmriti tangatetbatem ajanga linük mekümzüksü saka raksatsütsü. BJP aser Ato kilonser Modi-i linük temzüng raksatsütsü atema tanem-tanemi inyaker," ta aitsü.

Kharge-i, "'Sangh parivar' tangatetba ajanga Hinduism kübok nüburtem alar kümdaksütsü. Ajak Hindu yimsü kübok lir, ajisüaka ibaji Hinduism agi nembanga lir, parnoki nüburtem alar kümdaksüner. Asenoki nüchiso anguba ya Congress-i agütsüba lir. Modi-i ibaji agütsü asü? Iba mapang nungji Modi taso-a mesoi liasü aser Amit Shah-a tanur dang liasü. Item nisungtem yagi Nehru, Gandhi aser Ambedkar nunger anema jembir," ta aitsü.

Delhi-NCR nung AQI 'severe plus' kümogo

New Delhi, December 14 (Agencies): Delhi-NCR tesem ajaklen mopung quality ano tamajungba küma 'severe plus' category nung lir.

Commission for Air Quality Management (CAQM)-i Delhi aser NCR state sorkartem dang tangsa moapu nung saisapongba ajak nokdangtsüla, ta metetdaksüogo.

Commission-i shidi ka ajanga Delhi, Haryana, Rajasthan aser Uttar Pradesh state sorkartem dang, tamelen tetuyuba agüja liaka tang tashi Delhi-NCR nung aliba schools aser shisaliok rejutem nung moapu nung saisapong sentongtem agir, ta metetdaksü.

Mopung kanga menena akümba sülen Honibarnü CAQM-i Graded Response Action Plan (GRAP), Stage IV kübok tenokdangbatem benokogo.

CAQM-isa Delhi sorkar aser NCR state tem dang tangsa item tenokdangba shidak benoktsüla, ta metetdaksüba den külemi schools, shisaliok rejutem, sports associations aser ketdangsertem dang moapu nung saisapongba anenang aser tesayur o tsüraburtem nem-a mopung kanga menenba ajanga temang nung timtem agütsüba junga angatetdakjang, ta tuyu.

GRAP IV tenokdangba kübok Delhi-NCR nung kiojen

asüba mesüra kiojen bendokba maparen ajak nokdangba den külemi Delhi telungi aitba truck ajak nokdangogo. Ajisüaka nüngdakba osettsüset abenba trucks aser CNG, LNG, electric aser BS-VI diesel trucks bo iba tenokdangba kübok maiter.

Delhi aser NCR districts nungbo primary class nungi class IX aser XI tashi 'hybrid mode' ajanga class agitsüla, ta metetdaksüogo.

State sorkar tem danga, mopung quality ano kanga tamajungba kümra shisaliok rejutem shibangtsüla aser garitem 'odd-even number' senzüba benoktsüla, ta metetdaksü.



December 14, 2025 nü Mumbai nung 'Sharad Pawar Inspire Fellowship' award agütsüba sentong nung NCP (SP) Tir, Sharad Pawar adenba noksa nung angur.

Raj Kumar Goyal-i Chief Information Commissioner tenangzükba agitsü

New Delhi, December 14 (Agencies): Taoba mapang IAS officer Raj Kumar Goyal-i Hombarnü Chief Information Commissioner (CIC) tenangzükba agitsü, ta Amongnü linük Tir, Droupadi Murmu-i sangdong ka ajanga metetdaksü.

Ato kilonser Narendra Modi-i aniba züngsem aseme akümba committee kati CIC menden atema Raj Kumar Goyal tenüng benoka liasü.

Goyal ya 1990-batch Indian Administrative Service (IAS) officer liasü aser taküm August 31 nü ang Ministry of Law & Justice kübok Department of Justice nung Secretary menden nungi anisüngzüker lia tang CIC shim.

Tamalen pa Home Ministry kübok Secretary (Border Management) inyaka liasü aser Centre sorkar nung aser Jammu & Kashmir nunga menden balala nung tenzüko.

Hombarnü Tir Murmu-i ketdangsüa Goyal nem CIC tenangzükba agidaksütsü. Taküm September ita nung Heeralal Samariya-i CIC menden azüngtetja liasü.

Modi-i aniba committee-isa Central Information Commission nung Information Commissioners (ICs) menden atema tenüng 8 benoka lir. Item maparen ajak tembangba sülen Commission nung menden ajak abensatsü.

Iba Commission nung tekolakji CIC lir aser Information Commissioners 10 tashi alitsü akok. Tang Commission nung Information Commissioners teinyakdak anaji Anandi Ramalingam aser Vinod Kumar Tiwari na lir.

ICs atema tenüng benoka aliba 8 rongnung taoba mapang Railway Board nung tongti Jaya Verma Sinha, taoba mapang IPS officer Swagat Das, taoba mapang CSS officer Sanjeev Kumar Jindal, taoba mapang IAS officer Surendra Singh Meena, taoba mapang Indian Forest Service officer Khushwant Singh Sethi, senior journalist ana- P R Ramesh aser Ashutosh Chaturvedi na aser Petroleum & Natural Gas Regulatory Board (PNGRB) nung Member (Legal), Sudha Rani Relangi nunger lir.



December 14, 2025 nü Lucknow nung sentong ka nung Union Minister Piyush Goyal (ajichilen), Uttar Pradesh Chief Minister Yogi Adityanath (tabelen) aser Uttar Pradesh BJP Tir tasenba Pankaj Chaudhary (tiyong) nunger tangokba noksa nung angur.

Minister Nitin Nabin, BJP National Working President shimogo

News Delhi, December 14 (Agencies): Amongnü Bhartiya Janata Party (BJP)-i Bihar nung minister, Nitin Nabin National Working President shimogo.

BJP national general secretary Arun Singh-i sangdong ka ajanga, "Bharatiya Janata Party parliamentary board-i Bihar sorkar nung minister, Nitin Nabin Bharatiya Janata Party national working president shimogo," ta metetdaksü.

Iba sangdong agütsüba sülen Ato kilonser Narendra Modi-i Nabin nem tenügsang agüja, pa dak aliba tashi aser pai nendaka inyakba ajanga party tashi itshtitsü, ta ashi.

"Nitin Nabin ya party nung inyaker takutet ka lir. Pa ya lanur dang aser takutet lenir ka lir. Organisation nung pai aika

ajangshia lir aser Bihar nung MLA aser Minister junga inyakba record lir. Nüburtem taginüba ataloktsütsü atema pai kanga nendaka inyakogo. Pa ya ajemalu ka aser mapa nung kanga tenendak. Pa dak aliba tashi aser pai nendaka inyakba ajanga party tashi itshidaksütsü ta ni amanger. BJP National Working President akümba atema ni pa nem tenügsang agütsür," ta Modi-i X ajanga metetdaksü.

Tawa Bihar election nung Nitin Nabin-i maneni Bankipur Assembly constituency nungi takok ngua liasü. Pai vote tali 51,000 agi RJD lenir Rekha Kumari madak takok ngua liasü.

Tang pa Bihar nung Road Construction & Urban Development Minister teinyakdak.



TIR YIMYIM YIMOBILEM (EDITORIAL)

DIMAPUR MONDAY, DECEMBER (LUCHII) 15, 2025

Mezüng E-Census

India ajunga nung sangküm 2026 küm nungi 16 buba nütsüng yongsük asükba mapa tenzüksü. Atangji, British yimli kübok alena aliba nungi India yimten nüchi ngur külen agiba nütsüng yongsük asükba sentongbo tang agitsü aliba ya 8 buba dang asütsü aser mezüng tiben agibajibo British yimten yimli kübok aliba mapang agiba asütsü. Ano, tang agitsü aliba nütsüng yongsük sükdangba mapa yabo tamale agia aruba dang nungi kanga agia tekarakaba, tejangjaba aser temezüngba nung Electronic Census agitsü, anungji senso shiai pei mobile nungi census app amshia peisasa tenüng zülüoktettsü. Iba ama pei dang mulungra peisasa pei tenünga zülüoktettsüsa mobile app nung 'option' agütsütsü. India nung senso shia tenüng zülüokba nütsüng yongsük sükdangba mapa ya alima nung yimten ketdangsüba mapatem rongnung tulutiba lir. Iba mapa ya anogo 500 dak tali agia nisung lakh 30 dak talii sen crore 11,718 endoka inyaksü asoshi center government-i latetogo. Tangbo iba census mapa ya mapang ana kuma lemsar agitsü renemogo. Mezüngbuba nung, kilen tama azüngtsü aser ajibo sangküm 2026 küm April nungi September ita tashi agitsü aser tanabuba shilem nungiang nütsüng yongsük sükdangba mapaji 2027 küm February ita nungi tenzüksü. Ajisüaka, kasa linük nungsa süaka temokong tesem Ladakh, Jammu & Kashmir, Himachal Pradesh aser Uttarakhand nungbo sangküm 2026 küm September nungi tenzüksü. Atangji, linük nung nütsüng sükdangba ya asen lima nung nisung kwi, tetsür kwi aser tebur kwi ta kisüng meteter ayutsü asoshi masü saka nübortem asoshi tarutsü nung inyaka aotsü sentongtem aika asoshi kanga tongtibang temetetsütem lir. Ano, iba nütsüng yongsük sükdangba sülen yimteni inyaksüba mapa ka anendaka alibaji, "Parliamentary aser Assembly Constituencies" asetshitepa 'delimitation' mapa inyaksü. Idangji, Nagaland nunga ashiko parliamentary constituency ka dang aliba ya ana asema akümtsüa akok aser district kar nungbo temelenshiba alitsü. Aji oda, district kar nung tang aliba assembly constituency eshinba akümtsü aser kar nungbo teimba akümtsü ta nütsüng yongsük tasenba nung aliba yari yimten yimsüsüba mendenji asetshiteptsü. Iba amaji, center aser state government sentongtem nunga nütsüng yari dang mapaa inyaksü alinung, terenlok sentong ajakji nütsüng yongsük nungji amendaker inyaksü. Atangji, nisung ajaki pei kin, pei district aser yimtaksa nütsüng teimba süner, aji alima meimchir yimya, anungji nütsüng aika aginüra tanur aika asotsüla. Ajisüaka, tanur asotsüba nungi nisung mulung masü Tsüngrem mulung, anungji Tsüngrem dang meshitsüla aser agütsüra menokdangtsüla. Ano, tongtibang kaji, nütsüng yongsük asükba mapa ya nisung ajaki kanga süoki ia agitsüla aser kanga temulung agüja pei nung zülüokdaktsütsüla. Nisung karibo nütsüng yongsük asükba mapa ya kecha nungdak maliba mapa amai nemzünemkoa toktsür aser pei tenünga zülüoktsüa mapang magütsür. Kasaji E-roll atema tenüng zülüokdanga süoki ia shilem magir, saka terenlok aser tajangzük mapa nungbo ajaki shilem aginer. Ajisüaka, pei yimtaka sang, town nunga sang, terenlok mapatem asoshi senotsü teyari aser tajangzük arubaji government-i tesem shia nütsüng yongsük apir yoker ta senso shiai metettsüla, anungji asen tenüng malidakbo asenok teyari aser tajangzük angutsüba temetena malia ta peisasa angatettsüla. Atangji, Nagaland nung tia majung kaji, tang nungi balaka mapa ajak nung kin apia alemer aser aoer. Tatishitsü kaji, tang Nagaland police shimtsüba maparen nunga district shia dang masü saka Naga kin shia nütsüng yongsük apir lemetsüogo. Joko, iba amaji tatsükabo aotsüsa akümtsü. Idangji, asenoki bilemdangtsüba mapa kaji, tanga tesem khen toktsür Dimapur ama Naga nunger inti meyong yimti nung alir Aoer nütsüng ajak pei tetsü taso lima Mokokchung district nung tua züngokdaktsü nungbo, asüngbo Dimapur nungbo asenok shilem makatsü. Iba jagi talila ajangzüktsü melen talika akoksatsü. Atangji, Kohima ama nung alirtem asoshibo kecha masü ta bilemer saka Dimapur yabo asen lima ta bilema Census aser E-roll nung nütsüng züngokba mapang Dimapur nung alirtembo Dimapur nung züngoktsüla aser election mapanga Dimapur nung alitsüla.

OLEMSABANG

TASÜR-SÜR TAMASÜR

~ P.Renthy Jamir

OKILA- Asen Ao oshi nung tanur nübu majungdang asürtem dang tepen remzüka tsük, tepen petsa ta jembir, Aiür asangur asürtem dang tebenjem mapang nung asü ta jembir. Ano nisung ka yimten lokti nung tongti shilem agia alidang atura mapang süadokra tom nung aku ta kutok ta jembir. Ano tantsür tambur joko tasü meshia arshia lir asürtem dang süngshi luket ta süngshi loktok ta ajar. Saka Ken No. 208 atenba ama parnok ajak asüdang akümlir mulung ayanger aser rongjenseta nüktzü ayimer. Saka Tsüngremi yangluba nisung ajak ya tasütsü aso. Anungji Sayutsünger kaket nung yamai zülü "Tanela sota ayutsü nisung shinga daka tashi mali mesüra tasüba anogo madak pa ain mali" "Ajak tesem kati dang aor ajak aoyi nungi aser ajak tanaben aoyi dang akumer" "Kechiaser akümliri parnok asütsü ta metet"

TOM AKUR- Aor tongtipang nisung tulur tilar ajaki metetba nisung shirnok anojungi nübur ajaki aginüdag akümlir wadang metembang nemdaka yutsür taküm tembanga asüyimi ao (1960's nungi 2025) aika rongnungi kar tatishitsü amshia zülur. Parnok ya Aor ajaki meteta lia anojungi asürtem tongtibang kar:-

- 1. Dr Imkongliba** - Pa (Founding architect of Nagaland Statehood) State ngutetsang. Pa mezüngbuba Naga peoples Convention President ano Interim Body nunga pa Chiarman liasü. Anungji pa memeteter shinga mali. Saka Ao Kin onsara takoksa pungmang taginütsü mepungmang pa taküm tetsui asoba Tsüngremer yongsük küm mabensadang wadang tuluji nemdaka yutsur tom nung kazüka tsükchir kabu nung taküm apanatsüsa mapangi bentsür arua Aor ajak atema tesama tulu liasü, aji tanü tashi Aori züngshir.
- 2. P. Shilu Ao-** Pa Chief Executive Councillor Interim Body nung inyak aser Mezüngbuba Nagaland Chief Minister mapa inyak. Pa mapang Nagaland State angu, ano Cease fire lapok. Pa memeteter shinga mali. Pa tamasayongi Nagalima rangben tokolakba menden nung tua amenba takutet yimsüsür. Tsüngremer arishi Kümsük tom nung akuba masü, saka pa yimli merena sentsüwangshia alidang ajungbena temaba menden nungi akuzüka tsüktsüsa tia taku ajuruba den ano kibong mepetmesü adoka terunem agi teshinem melena tesanem agi tezükne kuma balalulatsüsa mapangi bentsür aruba ajanga Aor ajak nükrangtong marba kolak sosa-a ao ama takoksa ajuru. Koba tatalokba tanü tashi Aor senso ajaki sasaseta bilemer.
- 3. Imsongti** - Pa mezüng Aor temeteter taküm ka shiba Naga nüchiso bushiba wadang nung taküm kibong rangben bendanga agüja inyak. Pa Dikhu State (Ao Phom Konyak etc) region ajak madak Federal Government of Nagaland nung Ahang mapa inyak anungji Aor ajaki pa jungjunga metet. Saka nisungi teyanglur sentong mangu nung anojungi iba wadang tulu benloka alidang par kibong asoshi dang masü Aor rangben takoksa tetsui asoba Tsüngremer arishi anogo kümsük mebensadang kinungtsü tena atentepa tasübai jar tom nung kutoka asüyimi ao. Pa taküm otsü tanü tashi Aor ajaki mamateti jembir.
- 4. Tally Mongro-** Pa Nagalima nüchiso bushiba Wadang nung NSCN (K) telok nung tokolak ka süa General Secretary inyak. Anungji Aor ajaki pa meteta liasü. Pa Aor meimba linük tenzüker tongti ka liasü. Pai 11-11-1996 Changtongya town nung ni, ni Aor Senso ka ama Aor kanga meimer aser junga tenzüknür, saka kü den yariteper nisung tajung temeteter kata arua shilem magir, tangar kinbo nübu tajung aika inyakdagi ta ashiba bilemteter. Kechiyong tema nung yimsüsür aser telung nung linük tenzüker shir südir Aor chanui Aor meimtsü tim. Saka Aor ajak tia maka pa Tsüngremer yongsük arishimetongjungi yakta taküm tembanga tsükchir kabu nung asü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

EU nung South Asia nung Khristan tem reshikang shiba indang jembi



Brussels, Belgium nung European Parliament nung South Asia nung Khristan tem reshikang shiba tebilemtsü onük nung o lemtepdang tangokba noksa nung angur.

December 14, 2025: Tawa Brussels, Belgium nung European Parliament nung South Asia nung Khristan tem reshikang shiba tebilemtsü onük süoka jembi.

Iba conference ya ADF International-i "Targeted Violence against Christians in South Asia" onük nung ajemdaker ayongzüka liasü.

ADF International-i iba sentong nung adentsü atema meimchir temeden atema inyakterem aser reshikangshi nungi jenburtem-a jaoka liasü.

ADF International, Advocacy in Asia director, Tehmina Arora-i EU dang South Asia nung, talisa India nung yimsü tsütsü nütsüng ajema alirtem reshikangshi

nungi kümzüksü mepishi.

Arora-i, "India nung Khristan tem nem temerenshi agütsür, aser ibaji parnoki aibelenba agi masü saka adenshir sarasademba mesüra kiyongertem yariba agi lir. Tawa Supreme Court of India-ia Khristan tem reshikangshitsü atema anti conversion ozüng tim mesüi amshiba metetdaksüogo," ta ashi.

United Christians Forum-i ashiba agi, tesüiba küm 10 tsüngda India nung Khristan tem reshikangshiba shilem 500 agi teimba kümogo.

Taküm küm tenzüker October ita tashi nung India nung loktii Khristan tem amakba, yimjak nung maaksütsüba, tekülem sentong

tagidak mapang nung timtem agütsüba aser kiojen raksatsüba tatalokba 600 dak tali lir.

Parnokisa Pakistan nung Tsüngrem mezüngmeshiba ozüng kübok Khristan tem nem tai tonglokja tepuokdak ayuba tebilemtsü onük lemsatep. Pakistan nung 2020 küm Tsüngrem mezüngmeshiba ken o 11 dang liasü saka 2024 küm nungbo item ama ken o 475 liasü.

"Alima linüktemi tiyongtsüi ia meinyakra tai maket nisung million aikati maneni item ozüng kübok timtem ajurutsü," ta parnoki metetdaksü.

O jembirtemisa Sri Lanka, Nepal aser Bangladesh ama linüktem nunga Khristan tem atema tensa tamajungba dang akümba tebilemtsü lemsatep.

Slovenian nunger Khristan aser Member of European Parliament (MEP), Matej Tonin-ia Khristan tem reshikangshiba tensa tamajungba dang akümba tebilemtsü lemsatep.

Ajioda Tonin-i EU dang South Asia nung yimsü temeden ajungkettsütsü atema EU rongsen amshitsü mepishi.

Tonin-i, "Tanü alima nung reshikangshi tamajungba ajangshiba telokji Khristan tem lir. Asenoki iba onük ya yimjak nung ola tulu adoka jembitsüla," ta ayongzü.

Syria nung Khristan temi teimla tasen nung Khristmas amongtsü

December 14, 2025: Syria nung Assad-i aniba sorkar atsüngdokba sülen küm ka shi Khristan tem kanga timtema aruba sülen takümbo Khristan temi teimla tasen ka nung Khristmas amongtsü yongyar.

Osangbener den jembidang Rev. Nadim Nassar-i, "Taoba küm Khristmas bo Syria nung Khristan tem atema kanga majung liasü. Khristan tem tetsübu nung liasü," ta ashi.

Yaküm Khristmas anogo ka jakdang Suqaylabiyah nung Khristmas süngdong ka asonga liasü. Iba jakdangji prangpong amertemi Hama nung aliba Greek Orthodox Arogo Tenla ki amak aser linük tesem ajaklen security agüja iba benjung tetsübu nung among.

Rev. Nassar-i, "Tangbo tensa tajungba kümogo," ta metetdaksü.

Pai Syria nung par yimti Latakia nung Khristmas süngdong ka songa yutsüba sülen pa UK-i meyipa ogo. Khristmas süngdong songa yutsüba sentong nungji pa den putir ka, imam ka aser Muslim nunger mayor liasü.

"Onok ajaki yimsü balala amangertem tsüngda tesünep nung alitsüji tongtibang aser Syria ka küma longjema alitsüji

tongtibang ta jembiogo. Tesempa aser tejashi toktsür ajak tesünep nung alitsü atema onoki jembi," ta pai metetdaksü.

Paisa, "Tensa kanga junga liasü, aser ibaji Khristan tem atema kanga tajung. Ni talitabongbo mejembiner saka teimla tulu lir," ta ashi.

Bashar al-Assad-i aniba sorkar atsüngdokba aser civil war anenba sülen yaküm December 8 nungi Hayaat Tahrir al-Sham (HTS)-i yimsüsür. HTS-i yimsü balala amangertem ajak temeden parnoki akhümtsübuttsü ta nangzüko.

Taküm March ita nung Alawites amakba mapang nung Khristan tem-a aika asü aser June ita nung Tenla ki ka bomb amshia amakba mapang nung nisung 25 asü.

"Kodang minorities kari timtem ajangshidir tanüngba minorities-ia 'onok mapang kodang arutsü? ta tsübur," ta Rev. Nassar-i metetdaksü.

Parnoki Khristan temi Kangki külemertem ta ajar, ta pai ashi.

Yimjung yangluba Awareness Foundation tentetsang, Rev. Nassar-i mangyangtsü atema inyaksangshiba anema rarar aser yimjung atema inyaker.

Ano külen lanurtem aikati Ambassadors for Peace inyaksü atema Awareness Foundation nung adener. Syria linük yanglushitsü mangdang yur parnoki inyaker.

Rev. Nasser-i, "Tejakleni aotsü atema ajaki longjemer telongjem, temeim aser ochi temeden atema sarasademtsüla. Tai atoktsü atema tashi angutsü asoshi sarasademtsüla, ajaki aibelenogo aser temenen menaogo ta nangzüksüla aser kati ka dang tai atoktsüla," ta ayongzü.

ANO GO ABEN TSÜNGREM DEN

Ajak mesama

Kechiaser nisung chir sama-a aliba bushitsü aser kümzüksü aru. (Yhn 3:17)

Khristan saka Khristan taküm yimya mesukshir. Ochi agi yaritepba agi anunga akümer. Khristan jakla mesayutetter. Tanela nung aser atangji nung külemba mali. Alima yimya jenjang aser yimya nung Khristan taküm alir. Shingaia tajung meyimlaba mapang ka asen dangi aru. Iba tsütsü nungi bilemdang ajak samar ama bilemer. Saka ajak tesama masu. Kodang nungdakba osangtajung tashiji agütsüdir idakji mapa inyakba tashi dena lir.

Yangi iba osangji lir: Kechiaser nisung chir sama-a aliba bushitsü aser kümzüksü aru. Shiba samaa lir? Kechi sama? Yimya agi iba tekong nungi "shiba sarna?" sama ta tasungdangba adoker. Iba yagi "kechi sarna" ta tasungdangba adokdaksür. Ne taküm nung kechi sama? Tepela? Yimjung? Teimla? Telungjem? Osangtajungji ya; Tsüngremi Yisu nung na dang masu saka na akaba ajak kümzü.

Atangji, Yisu agi ajak tesama mekümdaksür. Na tanü pela lir ma? Khristai na balaka kümdaksüogoma?

Myanmar nung Arogo dang Khristmas anogo nung tekülem magitsü tuyu

December 14, 2025:

Myanmar kübok Kachin State nung sepaitemi Khristan tem dang December 20 matongdangsa Khristmas sentong agitsüla, ta tetuyuba agütsüogo.

December 28 nü election agitsü aliba nung ajemdaker sepaitemi Khristmas anogo nung Khristmas tekülem sentong magitsü saka jelia agitsü tuyur.

Iba tetuyuba ajanga Myitkyina, Putao aser Tanai nung aliba Arogo tem kongshitsü. Sorkar tetuyuba tashi mangara temerenshi alitsü, anungji Khristan temi tetuyubaji shidak benshitsüsa akümtsü, ta osang ka ajanga metetdaksü.

Osangbener den jembidang Tanai nung Khristan kati, "Iba ya tamangba yimsü temeden anema inyakba lir. Kü akümlü nung Khristan ka ama ni yamai kodanga majangshidangi liasü. Tasoba anogomongji tanga anogo ka nung amongtsü tuyuba ya tim masü. Ibaji shibaibo pelaa agizüksü. Iba benjungmong (Khrista asoba anogo) ya pei tasoba anogomong den kanga tongtibangba lir; iba ya Khristan tem atema temeshitiba anogo lir," ta ashi.

Tawa Yangon nung aliba Assemblies of God Church nung arrshi küm 23 pastor, Rev. Pau Muan Lian kangshia sepai

nung aniokogo.

Rev. Lian ya November 30 nü sama, aser tesülen ang pa sepai nung kangshia aniokba osang jangjaa liasü. Myanmar nung ozüng kübok yimsü lenirtembo sepai nung anioktsü memelar.

Myanmar kübok Chin aser Kachin State naprongla nung Khristan nütsüng aika lir. Myanmar nung sepaitemi democracy sorkar atsüngdokba sülen state ana nung Tenla ki aika den kiojen aika bomb agi poksatsüogo.

Christian Solidarity Worldwide (CSW) Tir, Mervyn Thomas-i, "Myanmar nung sepaitemi tashi amshia election ayongzüker. Iba election tenüng amer parnoki yimsü tsütsü nütsüng ajema alirtem anema inyaker," ta aitsü.

Thomas-isa, "Sepaitemi Khristan tem dang Khristan yimsü nung temeshitiba benjung ka tanga anogo ka nung ang amongtsü tuyuba ya tamangba yimsü temeden anema inyakba lir. Iba dak alia yimsü lenir ka kangshia sepai nung aniokba ya par linük ozüng alema lir," ta ashi.

Meimchir temeden atema inyakba telok aikati alima linüktem dang Myanmar nung agitsü aliba election ya aitsütsüla, kechiyong iba ya Khristan tem anema inyaksü atema lir, ta ashi.



Dimapur , Chümoukedima, Niuland Akhoya Fellowship 2025 Christmas yongya sentep sentong Youth Oasis Center nung aliba mapang tanurtemi shilem agiba noksa nung angur. (Dimapur, December 14, 2025).

AO OSHI ANGAZÜKDAK:**TANÜ ANGAZÜKTSÜBA OJANG****Tsüngküm**

(n) temokong, asükwa mapang (winter, cool season)

* Tsüngküm nung kaketshirtem sodi angur.

Tsüngkümmongpu

(n) küm nung mapang telemsa balala (seasons)

* Küm nung tsüngkümmongpu telemsa pezü lir, itemji meiwa, mangkonang, tsüngkhüm aser metsü mapang.



Tir Yimyim

OLONG PAITEP # 7360

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüak asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidadong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7359 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzüak, 11. teronem,
12. Sempa, 13. Jahaz.

NAI-A YA METETTER

Maldives nung Siyam World ajanga Guinness World Record tasen ka yangluogo. Siyam World ya Noonu Atoll nung five-star resort ka lir aser 'The Most People Snorkeling Simultaneously at a Single Venue' atema otsü tasen yanglu.

Iba alizüing atongtsü atema Siyam World-i Freedive Maldives den yaritepa Snorkel World 300 ayongzüak aser December 5, 2025 nü snorkelers 307 adenshia shilem agia liasü.

Mizoram nung state-level skill competition 2025 agiogo

Aizawl, December 14, 2025

(Agencies): Mizoram nung Labour, Employment, Skill Development & Entrepreneurship (LESDE) Department ajanga State-level Skill Competition (SLSC) 2025 ayonga agiogo.

LESDE Auditorium, MINECO nung iba tetoktepba tembangba sentong ya LESDE Minister Lalnghinglova Hmar-i ketdangsüa aser skill categories balala nung takokertem nem sempettem agütsü.

"Iba tetoktepba ya December 8 nungi 12 tashi agi aser lanur 1,048-i shilem tajung

agiogo. Iba sabang ajanga Mizoram lanurtem indang sempet aser takoktsütem sayur aser parnok inyaka aotsü ajungmesor" ta Minister Hmar-i ashi.

"Tanü putu nung skill mashii ka digitized süteter. Alima den putepa skills tajungba aküمرتem tejakleni aotsü. Lanur renloktsüba ya kanga nüngdaker kechiyong iba ajanga state aser nübortem tejakleni aotsü. State sorkari lanuputu tashi itdaksütsü atema mapa balala inyakba pusama nungittsü" ta paisa ashi.

Ministry of External Affairs-

i LESDE kübok Mizoram Council for Vocational Training (MCVT) mulunga agizükogo. Iba nung skilled lanurtem bendanglen oa mapa inyaksü asoshi yariteptsü aser teshimteterem nem specialised training agütsütsü ta Minister Hmar-isa metetdaksü.

Iba sentong nung bakery, beauty therapy, cabinet-making, carpentry, aser car painting telemsa nung takokertem nem sempettem agütsü. Parnoki Guwahati nung regional-level skill competition nung Mizoram tenüng nung shilem agitsü.

Assam police-i retired Air Force officer ka apu

Guwahati, December 14, 2025 (Agencies): Assam Police-i Sonitpur district nung retired Indian Air Force officer ka puogo. Iba nisung yagi Pakistan den sendaktepa alir nem osang sangoktsü ta tai tonglokja lir.

December 13, 2025 nü iba nisung apu aser iba ajanga national security atema tebilemtsütem aser taoba

defence personnel-i digital platforms tim mesüi amshiba indang onük jembir.

Taoba Indian Air Force officer-i social media channels ajanga confidential documents aser strategic details lemsatop. Item ya Pakistani intelligence networks den sendaktepa alirtem nguogo ta bushisüngdangertemi ashir.

"Tai tonglokja alisang aser

bendanger den sendaktepa alirtem tsüngda electronic communication asüba bushitetogo. Pa apudang police-i laptop ka aser mobile phone ka puogo" ta Additional Superintendent of Police Haricharan Bhumij-i ashi.

Ketdangsürtemi laptop aser mobile phone forensic examination atema bener yokogo.

Manipur nung petrol litre nung Rs170 agi ayok

Imphal, December 14, 2025

(Agencies): Manipur nung Honibarnü Manipur petroleum dealers-i anogo ka mokdanga lungkak aitba ajanga petrol mengui timtemogo.

Manipur nung petrol pump kiburtem dang bomb amshitsü ta amokmerenba aser telungpur teloktemi ozüing alema donation meshiba atema parnoki lungkak

aitsü ayongzüak aser iba ajanga black market nung jenjang tasak agi petrol ayok.

December 6, 2025 nü Imphal East district nung Ibudhou Pakhangba Filling Station indang restroom telung nung hand grenade ka yuja aliba angu. Parnoki meshiba ama magütsüra mapa tamajung inyaksü ta hand grenade den

shidi ka zülur tokja liasü.

Indian Oil, HP, Assam Oil, Bharat Petroleum, Goal Bio Oil, aser Nayara Energy dena Manipur petroleum dealers fraternity aser fuel retailers ajanga amokmerenba aser sen meshiba inyakyimtem aitsüogo.

Honibarnü Imphal black market nung petrol litre nung Rs 170 agi ayokba osang angazüker.

Israel-i Gaza nung Hamas tanishir tepsetba jangjaogo

Gaza City, Luchii/December 14 (Agencies): Israel-i Gaza amakdang senior commander Raed Saad tepsetogo ta Hamas-i tejangja shiogo, anungji October ita nungi ceasefire nung arudang Palestine nunger telok nungi tematiba lenir tepsetbaji Saad ya alitsü.

Israel mitkari Honibarnü Gaza City anasa amakdang Saad tepsetogo ta shia liasü. Iba mapang nisung 25 yiru.

Deobarnü video sangdong ka nung Saad tepsetba indang jangjatsüdang, Hamas indang Gaza chief Khalil al-Hayya-i Israel nungeri ceasefire nung alibelener ta aitsü.

"Yashi ang Hamas commander ka tepsetba densema Israel-i maneni aibelenba yong onoki tetsüngtai aita yimjung ken o jembitsürtem, talisa US administration aser US Tir Donald Trump dang Israel-i ceasefire tezüngzüktep akumtsüboa aser mapa kuma inyakdaksütsü ayongzüker," ta pai ashi.

October 10 nü ceasefire tenzükbä sülen Israel-i Gaza nung anogoshi tanen makai amaker - 800 ben jungnüa makogo aser nisung 386 tepsetogo - koba tezüngzüktep

alema aoba lir ta Gaza nung aliba ketdangsür temi ashir.

Ajidang masü rara anena atatsü terms nung aibelenä Gaza telungi teyari oset sadema bener aitsü Israel-i memulunger, aser Strom Byron sülen Palestine nunger nisung meyrirjang aika timtemtar.

Taoba hopta United Nations General Assembly nunga Gaza Strip dangi teyari yokba nung tenokdangba lapoktsü, UN facilities amakba anentsü aser international law nung aliba ama inyaksü khanga pangzüng ka renema liasü.

October ita rara anentsü züngzüktepba nungya Hamas indang nok-nü yutsütsü, aser Trump-i benokba ama international stabilisation force yoktsü shia lir.

Ajisüaka al-Hayya-i international peace force teinyaksü ya tataktet ka dang asütsüla ta shia liasü, shiba Doha nung Israel-i September ita tepsettsü merangba nungi takum jenbua liasü.

"International peace force indang mission ya ceasefire shidak amshidaktsütsü aser Gaza Strip arütsü nung tesem ana sadangtsü atema dang asütsüla," ta pai ashi aser Hamas aser Palestine nunger danga telok tem iba agreement

nung nokdaka lir saka Gaza mesüra yangji aliba nübur dak 'guardianship' benoktsü merangba magizüker ta shia liasü.

Saad yagi Hamas tashi itshtisü atema inyaka arur ta Israel army-i Telegram post ka nung tai tongloksü, shirnok Israel-i küm ana dak tema Gaza nung raradang kanga mejungi tashi ajemtsür lir. Pa ya October 7, 2023 nü Israel amakba tasa yanglur rongnung ka lir ta ashir.

Israel defence ketdangsüri Saad ya Hamas indang nok-nü yangluba force tekolakba lir ta ashi aser Hamas-ia pa ya par telok indang armed wing tekolakba Izz al-Din al-Haddad sülen second-in-command lir ta ashi.

Christmas

ADMISSIONS OFFER

Starts 15th - 31st Dec 2025 **60% Off**

Join Nagaland Most Trusted Institute for NPSC

#5YEARS 58GOVT. EMPLOYEES

Become an Officer, Join our January 2026 Batch

Call for **NPSC 2026**
+91 7005114715

EduVersity PLUS
CSE PREPARATION 2.0

Thailand-i asendenshir Cambodia amak tenzükogo

Bangkok, Luchii/December 14 (Agencies): Thailand indang military-i, par litsü meyipa agitsü atema asendenshir Cambodia amak tenzükogo, aser parnoki United States tir Donald Trump densema linük balalai yimjung atema teyongtsüi ia iyaksü merangdangba magizük.

Linük ana tsüngda arrtsü km 800 junga lateta maliba ajanga mangatettep ya adok, koba tang tasen masü. Tang rara nung linük anaprongla nungi sepai aser civilian 25 süogo, aser nisung million tesadang ka pei talidak ki toktsür jenshia aotsüsa kümogo.

Matichon Online osang kakat sangdong ka ajanga ashiba agi, Royal Thai Navy otongdar Rear Admiral Parach Rattanachaiyapan-i, parnok sepaitemi Thai indang litsü meyipa agitsü atema tzüküm nung aliba Trat province kübok tesem kar amak tenzükogo, ta ashi.

"Inyakyim ya anepdang yakata tenzüker aser kanga sashia raratepa liasü, koba international temzüng ozüng dak ajemdaker self-defence principles kübok aser linük sovereignty wazüka ayutsü atema benoka inyakogo," ta Rattanachaiyapan-i iba Thai osang kakat dang ashi.

Thai military-i ashiba agi, parnoki iba tesem takok ngua azüokogo aser parnok anemertem ajak mintokogo.

Public television channel Thai PBS-ia, linük military-i iba tesem nungi parnok anemertem mintokba sülen Thai wako asonga toktsüogo ta ashi.

Thailand indang TV 3 Morning News sangdong ka ajanga ashiba agi, Deobarnü anepdang tashi nung linük army, Navy aser Air Force arrtsü nung maneni inyaksangshidar.

Kasa sangdong ajangasa, Surin kübok Ta Khwai tesem densema tesem aika nung

maneni raratepda. Ta Khwai nung sepaitem khatepba den drone dena amshia maktepdar, ta metetdaksü.

Deobarnü tatalokba dak sendakba nung nisung asüba osangbo kecha mali. Cambodian military-i Deobarnü raratepba dak sendakba nung kecha osang agüja mali.

Ajisüaka Cambodia indang news website Cambodianess sangdong ka ajanga, Pursat province densema tesem tenet amakba sangdonggo. Pursat province kübok Thma Da commune nung Thai military-i F-16 fighter jet amshia bomb poklokja liasü.

Thai military-isa, Banteay Meanchey province kübok Boeung Trakoun yimtsüng nung artillery injang khalokja liasü, ta ashi.

Linük ana tsüngda kanga mejungi raratepba mapang Thai sorkari southeastern Trat province nung curfew ka benokogo, ta Defence Ministry otongdar Rear Admiral Surasant Kongsiri-i Deobarnü Bangkok nung osangbenertem den sensaksemba mapang ashi.

Honibar aonung Cambodia-i, rara adoker aliba ajanga parnoki Thailand den arrtsü nung crossing ajak shibanga ayur ta sangdongogo.

"Cambodia Royal sorkari Cambodia-Thailand arrtsü crossing ajak osang tejangja ka magütsü tashi tang nungi shibanga ayutsü telemtetba agiogo," ta Cambodia indang Ministry of Interior-i Honibar aonung ashi.

Yimjung benoktsü atema alima kintemi nongshiba mapang arrtsü shibanga ayuba ya kidanger linük ana tsüngda tesendaktep tamajungba kümshiba temaitsü lir.

Honibarnü Trump-i, pai ceasefire tasen ka benoktsü atema linük anaprongla den takok ngua sensaksemogo ta ashi.

Ajisüaka Thailand nunger ketdangsürtemi ashiba agi, parnoki rara anentsü atema kecha tenangzüktepba yanglua mali. Iba melena Thai Ato Kilonser Anutin Charnvirakul-i par linük military-i arrtsü nung mangatettep adoker aliba tesemtem nung maneni raratsü ta ashi.

Thai Minister of Foreign Affairs Sihasak Phuangketkeow-ia Honibarnü sangdong ka ajanga, Trump-i jembiba o ya karbo tang kechi ataloker ali iba den meputep, ta ashi.

Trump-i ceasefire tasen ka benoktsü atema jembishinüba indang Cambodia-i indang indangabo melemsatep, saka Ministry of National Defence-i taoba mapang ashiba agi, Thai nunger indang jet temi Honibar anepdang tesem balala maka liasü.

December 7 nü mangatettep adoka Thai nunger sepai ana yiruba sülen tang rara ya tenzükogo, aser iba ajanga July ita Trump tiyongtsüi ia ceasefire ka benokba ajanga anogo pongu rara tembangdaksüba amajok kümdaktsüogo.

July ita ceasefire ya Malaysia teyongtsüi aiba den Trump-i nongshiba sülen benoka liasü. Iba mapang Trump-i, Thailand aser Cambodia nati tashi mangara shishilembatsü atema maongkatem sota ayutsü amokmerena liasü. Iba tenangzüktepba ya October ita Malaysia nung regional senden ka amenba mapang tajangjaba nung renema ayu, kong Trump-ia shilem agia liasü.

Honibarnü Trump otongdar kati ashiba agi, "tir-i telok ajaki nangzüktepba ama tenangzüktepba sülen tashi anga anidaksü imlar, aser nisung tepsetba anendaksütsü aser teti atema yimjung benoktsü asoshi aibenelenertem tarendak makai aitsütsü."

Lionel Messi-i Mumbai nung fan tem den ajurutep



Mumbai Wankhede Stadium nung Lionel Messi, Rodri de Paul den Sunil Chhetri aser Bengaluru FC telok nungertem angur.

Luchii/December 14, 2025

(Agencies): Argentine nunger nüngtugu asayar Lionel Messi-i Deobarnü GOAT India Tour 2025 nung shilem ka ama Wankhede Stadium nung fan tem den ajurutepogo.

Messi den Luis Suarez aser Rodrigo De Paul nunger fan temi kanga pelashishia agizüka liasü. Iba sentong nung nüngtugu cricket asayar Sachin Tendulkar-ia shilem agi.

Messi Wankhede tonga aruba sülen India nunger nüngtugu asayar Sunil Chhetri den ajurutepa salem lemsatpa liasü.

Messi-isa, Chhetri aser Maharashtra CM Devendra Fadnavis na nem Argentina jersey agüja liasü. Sentong nung CM Devendra-i Messi, Suarez aser De Paul nunger nem tetushi agütsü.

Messi shiba Deobar anepdang Mumbai tonga aru, pa Cricket Club of India nung celebrities tem den meet-and-greet sentong ka nung shilem agi aser iba sülen Wankhede Stadium-iao.

Honibarnü anepdang Salt Lake Stadium nung kanga mepetmesü tulu adoka iba tour tenzükba sülen nikongtsütsü

Hyderabad nungbo sentong kanga junga agia liasü. Messi ground-i ayong ayonga adok aser teammate Luis Suarez aser Rodrigo De Paul na den ball belenshia liasü. Telangana CM Revanth Reddy-ia parnok den shilem agia liasü.

Ballon d'Or tiben koker aliba asayar yagi ball belenshia sayua fan tem peladaksüba den stands-i ball ka yok koba, tia akar kati shia arua liasü. Uppal nung exhibition asaya ka asayaba sülen Messi nem Reddy aser Congress lenir Rahul Gandhi nati tetushi agüja liasü.

World Cup playoffs masaya tsüngda Suriname-i coach tasen shim



Henk ten Cate

Luchii/December 14, 2025

(Agencies): March ita World Cup playoffs nung asayatsü atema renemba mapang Suriname-i coach tejen Henk ten Cate, national team coach asütsü shimogo, ta linük football association-i Deobarnü ashi.

Arishi küm 71 tain Ten Cate ya taoba mapang Ajax Amsterdam indang coach liasü aser iba den pa Barcelona aser

Chelsea na nunga assistant ama inyakogo.

Suriname pur tang mezüngbuba World Cup atema qualify asütsü merangba mapang Dutch nunger coach yagi iba mapa agizükogo. Parnok March 26 nü Monterrey den Bolivia den play-off asaya ka asayatsü lir.

Parnoki iba asaya kokra parnok March 31 nü Iraq den

asayatsü aser iba sülen 2026 küm World Cup nung asayatsü masayatsü jangjatsü. Parnoki Iraq kokra World Cup nung parnok Group I nung France, Norway aser Senegal den Boston, Philadelphia aser Toronto nung asayatsü.

Suriname pur taoba ita World Cup atema qualify asütsü asoshi maongka liasü, saka Guatemala nung tatembangbuba Concacaf zone Group A asaya goal 3-1 agi makokba sülen Panama-i parnok ajateta temaba jenjangi atu aser ibayongji parnok March ita inter-confederation playoffs nung asayatsüsa aküm.

Guatemala nung tamakok anguba sülen taoba mapang Netherlands nunger international goalkeeper, coach Stanley Menzo-i mapa toktsü aser tang Suriname-i pa melener shimogo.

"Pa expertise, tactical tasa aser lenisüba ajanga team temaba jenjangi ajungkettsü ta SVB-i temulung lema bilemer," ta Surinamese association-i Ten Cate indang ashi, shiba tatemsa 2023 küm Suriname national coach Aron Winter indang assistant ama inyakogo.

Zinedine Zidane'er jabaso Luca AFCON asayatsü

Luchii/December 14, 2025

(Agencies): Iba ita asayatsü aliba Africa Cup of Nations nung Luca Zidane Algeria indang first-choice goalkeeper asütsü imlar, kechiyong Alexis Guendouz yiruba ajanga iba asayamung atema squad nung densema mali.

Guendouz ya Hombarnü Algerian league nung asayaba mapang temekok yiru aser pa Honibarnü AFCON atema sangdongba asayar 28 nung densema mali, aser iba ajanga Zidane nem lenmang lapoktsüogo. Iba asayamung ya Kidanger Morocco nung asayatsü.

Arishi küm 27 tain France nunger nüngtugu asayar Zinedine Zidane'er jabaso ya Oussama Benbot aser taoba No.1 Anthony Mandrea na jakdang lir, anungji iba asayamung nung pa goalkeeper asütsü imlar.

Zidane, shiba Spanish second-tier club Granada nungi asayar, pai France nungi masü saka Algeria nungi asayatsü atema telemetba agiba sülen October ita World Cup qualifier ka nung Algeria team nungi

mezüngbuba asaya liasü. Pa youth level nungbo France team nungi asaya liasü.

Par kibong ya Algeria kübok Kabyllie tesem nungi jakzükba lir. Zidane-i kanga kar team nung pa jenjang yanglu aser tang Algeria team Group E nung Burkina Faso, Equatorial Guinea aser Sudan den asayatsü renemaba mapang pai tongtibang shilem agütsü renema lir.

Kasa mapang nung Mandrea-a mimlai lia team nung züngoksemogo. Pa ya taoba mapang coach Vladimir Petkovic-i meshim aser pa melen France indang third tier nung asayaba goalkeeper ka shima liasü. Mandrea asayaba club Caen pur taoba season Ligue 2 nungi relegate süogo.

Algeria indang squad nung 2019 AFCON final nung goal idaktsüsang Baghdad Bounedjah-a densema lir. Team nung Marseille attacker Amine Gouiri mali, shiba tapu surgery agiba ajanga masayatetsüsa kümogo. Pa February ita tashibo masayatetsü. Pa yiruba ajanga tang agi tanabenbuba AFCON nung masayatetsüsa kümogo.

Ni IPL nung bowling sütettsü: Cameron Green



Luchii/December 14, 2025

(Agencies): Australia nunger all-rounder Cameron Green-i Deobarnü ken o jangjashitsüogo aser ashiba agi, pa taruba IPL nung bowling ontettsü. Paisa, pa indang manager-i aibelenba ajanga taruba hopta mini auction atema pa batter ama züngoksema liasü, ta ashi.

Arishi küm 26 tain shiba teberem yiruba ajanga 2025 küm IPL masayateti liasü, pa specialist batter ama June ita nungi international cricket asaya tenzükogo. Ajisüaka pa tangbo ball aontsü atema temelaba agütsüogo aser tang Australia o England na asaya aliba Ashes asayamung nunga ball ondar.

"Ni ball ontettsü. kü indang manager-i iba ya anganütsü manganütsü memetet, saka pai aibelen ka inyakogo," ta Green-i ashiba ESPNcricinfo-i metetdaksü.

"Pa 'batter' ta ashitsüba tebilembabo maliasü. Pai

aibelen box tai shim asütsü ta bilemer. Iba tatalokba ya temenünütsüka saka pai aibelen menaogo," ta Green-isa shisem.

Green ya 2023 küm Mumbai Indians nungi asaya aser 2024 küm Royal Challengers Bengaluru nungi asayaago aser taruba hopta auction nung ajaki aginüba asayartem rongnung ka asütsü imlar.

Iba acution nung Green indang base price sen crore 2 asütsü. Pa ya all-rounders' masü saka batters' category nung züngoksema lir.

Auction ya Mongolbarnü (December 16) Abu Dhabi nung agütsü.

"Ni tangar kar den iba ya reprangtsü. Iba ya reprangtsü jangrademtsüka lir. Iba ya lottery mesüker, kong na alitsü akok saka ner team nung shibasa alitsü mejangja, anungji auction ya reprangtsü jangrademtsüka lir," ta pai shisem.

BILEMDANGANG

"Waru temesüng mekümtet ama karbo kodanga memelenshitsü"